



Protocol

dalla seduta dil cussegl da vischnaunca,
gievgia, ils 16 da november 2017 allas 20.15 – 22.00
Liug: Casa communal

Presidi: Christoph Berger

Actuar: Paul Duff

Presents:

- | | | |
|---------------------------|------------------------------------------------------------------------------------------------------------|------------------------------------------------------------------------------------------------------------------|
| a) Cussegl | Armin Berther
Adrian Deflorin
Mario Flepp
Wendelin Jacomet
Giusep Lozza
Helga Probst-Linder | Stefan Columberg
Edgar Durschei
Rita Huonder-Tenner
Christian Loretz
Armin Manetsch
Livio Zanetti |
| b) Suprastonza | Robert Cajacob
Victor Flepp
Iso Mazzetta | Clemens Berther
Jris Lombris |
| c) Cumissiu da gestiu | Beat Hosang
Toni Huonder | Manfred Caviezel |
| d) Canzlist | Andri Hendry | |
| e) Perstgisas:
Cussegl | Anna Maria Genelin | Admir Jasarevic |
| f) Hosps: | 1 | |

Plaid d'avertura entras il president

Democrazia ell'Europa

Catalans e l'autodeterminaziun d'ina minoritad. Ils catalans ein quasi romontschs, lessen decider pli bia sez. Tgei vala pli bia, ina lescha en ina democrazia che vul metter ina suprastanza eligida en parschun, ni il giavisch da pli bia autodeterminaziun d'ina suprastanza eligida democraticamein?

Nus savein esser loschs sin nos dretgs politics. Igl ei denton donn, che buca tuts nezegian las pusseivladads politics che nus vein tier nus.

Las medias romontschas ein era in bien mied da promover il discuors politic. Senza sustegn finanziel san ins buca sustener talas purschidas.

Plaz scola

Ina varianta raschuneivla d'in niev plaz da scola ha saviu vegnir realisada. Ei fa grond plascher ch'ins ha saviu realisar quei giavisch dil cussegl da vischnaunca e da convischinas e convischins. Sperein nus che la sanaziun dalla scola vegni era prida enta maun.

Duvrein nus Ursera?

Ei para che nus s'orientein adina pli fetg encunter Ursera. Eis ei ina schanza, ni mein nus encunter ina dependenza? Con fetg astgein nus esser dependents dallas decisiuns da singulas personas ni investurs?

La stad ei per Mustér pli impurtonta

Svizra Turissem promova igl atun pervia ch'igl unviern piarda impurtonza. Era Mustér fa gia ussa pli bia sviulta durant la stad che durant igl unviern! Las cefras da pernottaziuns publicadas el rapport annual da SMT demuossan quei claramein. Las pernottaziuns dalla Reka e Campadi Fontanivas ein buca pridas en quella statistica. Tier novs hotels vegn la repartiziun stad / unviern ternor il meini dil president buca ad esser outra. Lessen nus buca entscheiver a baghegiar ora il turissem da stad? Ni vegnin nus aunc pli dependents digl unviern?

Communicaziuns

Mortoris:

Emma Catrina Loretz, naschida ils 30 d'avrel 1948, morta ils 29 d'october 2017.

Lui Bearth-Lutz, naschius ils 23 da zercladur 1941, morts ils 2 da november 2017.

Giuseppa Schmed-Monn, naschida ils 7 da fenadur 1914, morta ils 8 da november 2017.

Naschientschas:

Luisa Flepp, naschida ils 16 da settember 2017 feglia da Claudia e Manuel Flepp.

San-Tian Giger, naschius ils 8 d'october 2017, fegl da Rosangela e Flavio Giger-Klaiss.

Valentina Luina Tomaschett, naschida ils 17 d'october 2017, feglia da Eva-Katharina e Marco Tomaschett.



Cussegl da vischnaunca 2017/2020

Protocol no. 8

Seduta dils 16 da november 2017

Informaziun

Allas 19.30 survegnan ils cussegliers e las cusseglieras in'informaziun davart il project d'informatica en scola ICT entras il president dil cussegl da scola Simon Bergamin e dil meinascola Roger Tuor. Informaziuns leutier dat era la pagina d'internet dil departament d'educaziun dil cantun:

<https://www.gr.ch/DE/institutionen/verwaltung/ekud/avs/Schulbetrieb/lehrplan/lehrplan21/Seiten/Umsetzungsphase-2016-2021.aspx>

Tractandas:

1. Protocol 7-2017/2020
2. Preventiv 2018 (messadi nr. 12-2017/2020)

Cussegl da vischnaunca Disentis/Mustér
Il president: Igl actuar:

Christoph Berger

Paul Duff



Cussegl da vischnaunca 2017/2020
Protocol no. 8
Seduta dils 16 da november 2017

1. Protocol

Protocol nr. 7-2017/2020

Il protocol ei vegnius tarmess tier per posiziun. Enteifer ils tschun dis fixai ei vegniu inoltrau objecziuns, las qualas ein vegnidas amplificadas ed aschuntadas el protocol.

Il protocol vegn approbaus senza midadas.

Cussegl da vischnaunca Disentis/Mustér
Il president: Igl actuar:

Christoph Berger

Paul Duff



2. Preventiv 2018 (messadi nr. 12-2017/2020)

Presentaziun: La fatschenta vegn tgamunada dil vicepresidente dil cussegl, Armin Manetsch.

Suprastonza:

President communal Robert Cajacob: Ils detagls dils contos dil preventiv ein stai a disposiziun en canzlia per prender investa. Interessents han era saviu seolver tier ils caus dils departaments per informaziuns. Grondas parts dallas expensas ein fixas. Las autras ein budgetadas tenor il principi da spargnar. Igl andament positiv cun las surbaghegiadas Sontga Catrina ed egl avegnir Acla da Fontauna han consequenzas positivs per la vischnaunca.

Rapport dalla cumissiun da gestiun, prelegius da siu president Beat Hosang:

Conform agl artechel 54 dalla constituziun communal e dil regulativ per la cumissiun da gestiun havein nus controllau il preventiv 2018. La cumissiun ha repassau il preventiv en tut ils detagls ed ha tschentau las damondas alla suprastonza communal a caschun d'ina seduta comunabla. Per mauns dil cussegl havein nus rapportau a scret.

Nus essan pertscharts che tut ils presents han studegiu las cefras en detagl ed aschia lein nus buca entrar memia profund ella materia. Denton lein nus remarcar in ni l'auter punct:

Il cash-flow sepresenta cun rodund frs. 1'000'000.-- en rama d'ils davos onns – el ei denton plitost bass per ina vischnaunca dalla grondezia da Mustér. Ina gronda part dallas expensas ein ligiadas vid leschas e legislaziuns, contracts e cunvegnientschas. Auters cuosts ein movibels e selaien reducir, denton en bia cass mo cun ina sminuaziun da prestaziuns. Ils gremis politics san mo agir ellas ramas dadas e procurar per ina buna prosperaziun da nossa vischnaunca.

Ils impurtonts puncts ord il quen da gudogn e sperdita ein vegni menziunai el messadi.

Tier la dismessa e purificaziun d'aua, sco era tier l'economisaziun da rumien stuein nus constatar ch'ils cuosts vegnan buca curclai entras las taxas e ch'il quen da sparta ei aschia buca equilibraus sco el stuess esser. Ils deficits vegnan aschia cuvri ord il quen ordinari.

Il preventiv d'il Center da sport e cultura preveda ina sperdita da frs. 251'700.--, en quella ein investiziuns extraordinarias da frs. 82'700.-- inclusas.

Las prestaziuns dil Center da sport e cultura s'audan tier il service public ed aschia astga quella biala purschida era custar enzatgei alla vischnaunca. Denton duein ils cuosts vegnir optimai per survegnir ina buna relaziun denter purschida e cuosts. Ei fa senn da reponderar ina ni l'autra sparta, cunzun la restauraziun, quei era en vesta al niev concept per il Center da sport e cultura.

Il quen d'investiziun 2018 preveda investiziuns nettas en l'altezia da rodund frs. 3'100'000.--. La gronda part dallas investiziuns ei gia decidida, autras basegnan aunc decisiuns legalas. Gia sco menziunau a caschun dil plan da finanzas lein nus aunc ingada far attents che las investiziuns ston vegnir periodisadas ed etappadas optimalmein ed eventualmein era redimensiunadas per mantener in saun equiliber denter las investiziuns ed ils deivets.

En num dalla cumissiun da gestiun less jeu engraziar per la buna collaboraziun cun ils differents gremis durant igl entir onn ora. Per damondas stein nus bugen a disposiziun.

Discussiun:

Quen da gudogn e sperdita

Conto 0220.3010.00 Uffeci da baghegiar, pagas; conto 0220.4910.00 Lavurs per auters departaments

Cussegl:

Sa muort igl augment da personal buca vegnir fatg dapli lavurs per auters departaments?

Gerau Iso Mazzetta:

L'experienza manca aunc cun la nova situaziun da personal. Aunc ein da cumpensar biaras sururas. Indemnisaziuns per las lavurs dils emploiai per auters uffecis ein buca repartidas. En quei grau manca l'experienza.

Conto 1500 Pumpiers

Cussegl:

Ha ei buca dau in respargn entras la fusiun dil corp da pumpiers? Mustér porta la gronda part dils cuosts. Ei la clav da reparter ils cuosts correcta?

Gerau Victor Flepp:

La fusiun ei fatga avon 10 onns. In respargn ei grevs da contonscher. Bein incasseschan ils pumpiers taxas per lur prestaziuns e survetschs. Ils cuosts ein reparti tenor ils schazetgs dall'assicuranza da baghetgs e tenor habitonts dallas vischnaucas. Cheutras croda la gronda part sin nossa vischnaunca. Ils cuosts restan el rom dils onns vargai. La clav ei tematisada ellas suprastonzas involvidas.

Arver il corp enviars Sutsassiala ei caussa politica ed ei en discussiun.

Conto 2170.3110.00 Baghetgs da scola, Mobiliar da scola

Cussegl:

Tgei vegn fatg sut quei conto?

Geraua Jris Lombris:

Las investiziuns ein previdas en mobiliar per la scoletta, scolas primaras e secundaras, vischala per la cuschina, sil plaz scola vegnan las stangas da reiver remplazzadas.

La suprastonza pren encunter il giavisch che las stangas da reiver sin plaz scola duein vegnir cudischadas sut indrezs e mobiliar da sport.

Conto 2180.3130.01 Structuras dil di

Cussegl:

Tgei caschuna cuosts sut quei conto?

Geraua Jris Lombris:

Tenor la cunvegna cun la canorta d'affons «Lumpazi» s'augmentan ils cuosts, perquei che dapli affons van ella canorta. Plinavon sorprendan ils scolasts uras supplementaras per agid da far pensums culs scolars. Quellas van el rom da sustegn ed integraziun.

Conto 3290.3636.02 Engaschament per la giuventetgna

Cussegl:

Las vischnaucas Breil e Trun han sistiu la cunvegna. Co va ei vinavon cun quella lavur e co vegnan ils cuosts reparti da niev?

Entras l'abdicaziun da Breil ein aunc autras spartas pertuccadas tier la Fundaziun Tür auf – Mo vinavon. Co vesa quei ora egl avegnir? Plinavon duei ins mussar si e far attents che la proxima canorta d'affons sesanfla a Glion.

President communal Robert Cajacob:

Breil ha abdicau la cunvegna per la lavur da giuventetgna sin la fin 2017, Trun e Tujetsch sin la fin da 2018. La Fundaziun Tür auf – Mo vinavon savess surprender ina part dalla

summa che croda entras l'abdicaziun da Breil per 2018. Per ina part da quella summa quantan ils responsabels da Tür auf - Mo vinavon seolver cun ina damonda tier las vischnauncas. Plinavon fa la fundaziun patratgs sur da novas pusseivladads.

Interessents da Breil duegien da principi saver separticipar vinavon als camps da giuvenils. Ils cuosts stuess denton la vischnaunca da Breil surprender.

Conto 4 Sanadad

Cussegl:

Il survetsch d'urgenza nr. 144 ei vegnius dislocaus da cuort a Cuera. Sco ins auda, occuori ussa discussiuns pertuccont la sedia d'ambulanza a Mustér. Ei quei enconuschent?

President communal Robert Cajacob:

La causa ei enconuschenta. Ei va discussiuns denter la fatschenta da transports d'ambulanza Furger ed il Spital Regional en causa. En la discussiun ei era igl uffeci da sanadad cantunal staus involvaus. Las vischnauncas Sumvitg, Mustér, Medel e Tujetsch eran vegnidas contactadas dil Spital Regional cun la damonda da separticipar vid ils cuosts per saver mantener il survetsch d'ambulanza sco entochen da cheu. Tenor igl uffeci da sanadad cantunal ei quei denton buca causa da vischnaunca. Nus vegnin cul temps a vegnir informai tgei survetsch d'ambulanza che sa vegnir mantenius a Mustér per las vischnauncas sisum la Cadi.

Conto 3411 Center da sport e cultura

Cussegl:

Co sa quei esser che la caffetteria fa onn per onn in deficit da frs. 100'000.--?

L'indicaziun dil preventiv digl onn 2017 ei fallida per frs. 33'000.00. Co vegnan ils cuosts da personal reparti sin las spartas? Ils totals dallas spartas contonschan buc la summa da pagas totala.

Gerau Clemens Berther e canzlist Andri Hendry:

Il deficit dalla caffetteria succeda, perquei ch'ils cuosts da personal ein aunc buca reparti cumpleinamein sin las spartas dil menaschi. Quei san ins far pér cul quen definitiv.

La differenza da frs. 33'000.-- deriva dil credit posteriur che la suprastonza ha concediu duront igl onn per cuosts da personal dil Center da sport e cultura (stau budgetau memia bass).

La scuntraziun dils cuosts da personal sin las differentas spartas succeda intern sur ils contos da materia 3910 e 4910. Dils cuosts totals da pagas da frs. 489'000.-- vegnan frs. 390'000.-- reparti sin las spartas per las qualas il personal lavura. La summa restonta ein cuosts dil menaschi general, oravontut dil meinafatschenta.

Conto 4210.3160.00 Affittaziun local d'activitads

Cussegl:

Tgei ei previu cun quei local dalla surbaghegiada «Sut Gliendas»?

President communal Robert Cajacob:

Igl ei vegniu fatg in contract cun la surbaghegiada «Sut Gliendas» per affittar in local per diever public. Ils habitonts dalla surbaghegiada han medemamein il dretg da diever da quel. Il diever precis dil local sto aunc vegnir definitus.

Conto 5790.3611.00 Collocaziun ed assistenza da fugitivs

Cussegl:

Tgei munta la summa da frs. 18'200.--?

Gerau Clemens Berther e canzlist Andri Hendry:

Tenor la lescha cantunala davart il sustegn da personas basignusas pagan las vischnauncas naven da 2017 frs. 8.25 per habitont al cantun. La summa per igl onn 2017 ei pagada cun in credit posteriur dalla suprastonza.

Conto 7300.3144.00 Manteniment

Cussegl:

La summa budgetada ei previda per la sanaziun dalla cuvrada dil local da cadavers. Ord tgei motiv sto quel vegnir sanaus?

La summa da frs. 35'200.00 ei ordvart gronda.

Ei quella summa sin fundament da duas offertas?

Gerau Victor Flepp e canzlist Andri Hendry:

La cuvrada sto vegnir fatga cun in material special. Actualmein ei quella donnegiada e la sanaziun ei urgenta. Ils cuosts vegnan reparti sin las vischnauncas Medel e Tujetsch. Ei vegn a restar per Mustér ina summa da frs. 17'500.--.

Ei dat el cantun sulet duas firmas che san far quella cuvrada. Il material impundiu sto isolar totalmein. Ina secunda offerta sa vegnir tratga en.

Conto 8400.3635.02 Bus local

Cussegl:

La vischnaunca paga per il bus local frs. 150'000.--. San ins buca pretender da quels che fan diever dalla purschida frs. 1.00 per viadi? Cun la surbaghegiada a Sontga Catrina s'augmenta quei diever.

President communal Robert Cajacob:

La finanziaziun dil bus local ei adina in tema. Ella carta da turissem ei il diever cumprius. Far la differenza denter turists ed indigens san ins buca. Igl incasso e la controlla da taxas pretenda ina organisaziun ch'ei buca gratuita. Ils cuosts da transports dil bus e dalla viafier ein buca s'augmentai. La discussiun per il diever egl avegnir suonda.

Conto 8400.3635.00 Occurrenzas turisticas

Cussegl:

La collaboraziun cun ina uniun cuosta frs. 30'000.--. Ei quei giustificau enviers autras uniuns?

Survegnan autras uniuns era enzatgei per lur engaschament?

President communal Robert Cajacob:

L'uniun «Viva Disentis» organisescha occurrenzas per la vischnaunca. Ella surpren il tgamun ed integrescha ell'organisaziun autras uniuns dalla vischnaunca. Cun frs. 30'000.-- fagein nus enzatgei pils hosps. Da SMT dat ei renfatschas che quei segi memia pauc. Egl avegnir ei previu da surdar la responsablada per events turistics sco incarica a SMT.

Las ulteriuras uniuns dalla vischnaunca vegnan tractadas equalmein.

Conto 8500.3635.00 Promoziun dall'economia

Cussegl:

Da tgei setracta ei sin quei conto?

President communal Robert Cajacob:

Cudischaziun da cuosts per retschercas p.ex. dalla HTW e cussegliaziuns.

Gerau Iso Mazzetta:

Autras sfidas ein il concept da traffic, bus local, rundellas. Per sclarir quellas caussas aunc buca concretisadas occuoran cuosts.

Quen d'investiziun

Conto 2170.5040.00 Sanaziun casa da scola Cons

Cussegl:

Tgei vegn fatg cun quellas expensas?

Gerau Iso Mazzetta:

Ei setracta dil remplazzament dall'illuminaziun dalla scola nova. Vid quels cuosts contribuescha igl Uffeci d'energia ina cumpart. Frs. 43'000.-- vegnan cudischai el preventiv 2019.

Conto 6130.5110.01 Vias cantunales, Via Lucmagn

Cussegl:

Han ins anflau sligiazions culs vischins per las vias cunfinontas Via Gonda e Via Lucmagn?

Gerau Iso Mazzetta:

Igl ei anflau ina sligiazion, las lavurs succedan tenor project.

Conto 6190.5040.00 Luvratori communal

Cussegl:

Ei ha giu num ch'il luvratori communal hagi buca plaz sigl areal Baracca verda. Vegn quel ussa construius a Sogn Placi?

Gerau Clemens Berther:

Ei setracta buc dil luvratori communal, mobein dad ina remisa a Sogn Placi. Quella era prevedida d'ereger il 2017 quei ch'ei buca succediu. Aschia vegn ella fatga il 2018.

Conto 7201.5032.11 Canalisaziun Mumpé Medel

Cussegl:

Tgei ei previu da far en quella summa?

Gerau Victor Flepp:

La via cantunala vegn sanada igl onn proxim. En quei connex vegn era sligiau la spartiziun dallas auas. La summa totala ei calculada cun frs. 270'000.--, il 2018 occuoran frs. 130'000.--.

Cussegl:

Sereneras en general: Il manteniment dallas sereneras da vischnaunca ei budgetaus cun frs. 685'000.--. Ils gronds implonts sco Reka, Catrina Resort, cascharia ed eventualmein Acla da Fontauna ein baghegiai ni sin rucca. Sto la serenera Raveras vegnir engrondida ni aschizun baghegiada da niev? Ei vegniu fatg retschercas cun las vischnauncas vischinontas per far ina serenera per Sur- e Sutsassiala, savessen cuosts vegnir spargnai cheutras?

Tgei frequenzas occuoran sche tut ils habitadis ein en funcziun?

Gerau Victor Flepp:

Il manteniment ei daveras fetg cars. Las taxas da diever cuvieran buca ils cuosts. La serenera Raveras ei concepida per 10'000 habitonts. Per sereneras novas dat ei neginas subvenziuns. Ina gronda cumpart dalla capaciad vegn duvrada dalla cascharia. Cheu savess ins ponderar da far ina serenera autonoma per quella. In studi per ina serenera Cadi ei buca avon maun. Quella pretendess denton biars indrezs da pumpa, ils quals ein era cars cunzun el diever d'energia.

Cura che tuts habitadis dalla vischnaunca ein occupai dat ei mesiras tecnicas ch'ins sa instradar sch'ei fa basegns.

Conto 7201.5032.13 Canalisaziun Pignola

Cussegl:

Vegn la surbaghegiada Pignola ussa realisada sche la summa ei prevedida el preventiv?

Gerau Iso Mazzetta:

Nus stuein preveder quell'investiziun, sch'ei vegn baghegiu. Sche quei succeda, sto il credit esser daus per saver far las lavurs necessarias.

Controlla da credits

Cussegl:

Controlla da credits: Daco ein ils cuosts da frs. 155'000.-- per la maschina da far glatsch buca numnai ella controlla da credits?

Gerau Clemens Berther:

La maschina ei aunc buca furnida. Quei succeda denton pli probabel aunc uonn e lu figurescha quell'investiziun era ella controlla da credits.

Cussegl:

Tier la controlla da credits san ils suandonts credits vegnir stizzai ord la gliesta damai che las investiziuns ein terminadas:

2170.5040.01 Sanaziun cuschina en casa da scola

3411.5040.00 CSC remplazzar illuminaziun

3411.5040.00 CSC remplazzar mobiliar

3411.5040.00 CSC sanaziun urgenta dalla fatschada

6150.5010.00 Via Run

7201.5032.08 Canalisaziun Sontget – Carcarola – Ual Acletta

8250.5030.00 Punt e renaturalisaziun Rein a Fontanivas

8400.5010.00 Sutpassadi Chischliun

Canzlist Andri Hendry:

Quei giavisch vegn prius encunter. La decisiun sto aunc vegnir discutada cun la cumissiun da gestiun.

Cussegl:

Controlla da credits: Il credit da frs. 170'000.-- per il luvratori communal ei buca sin la gliesta.

Gerau Clemens Berther:

Quei credit era previus per il 2018. Il cussegl ha denton buca aunc saviu conceder quel.

Decisiun:

En concordanza cun la cumissiun da gestiun propona la suprastanza communal al cussegl da vischnaunca:

- 1. D'approbar il preventiv 2018 cun suttametter quel al referendum facultativ conform ad art. 21, lit. a dalla costituziun communal;***
- 2. Da fixar per 2018 il pei da taglia sin las entradas e la facultad sin 120% dalla taglia cantunala ed il pei da taglia sin schischom ad 1,7‰ (sco tochen dacheu).***

Il cussegl accepta las propostas senza cuntervuschs ed abstenziuns.

Cussegl da vischnaunca Disentis/Mustér
Il president: Igl actuar:

Christoph Berger

Paul Duff



Cussegl da vischnaunca 2017/2020
Protocol no. 8
Seduta dils 16 da november 2017

Orientaziuns:

President communal Robert Cajacob:

Ils 12 da schaner 2018 ha liug in'informaziun sur dil project Hotel Acla da Fontauna entras ils investurs. El medem rom informescha la suprastanza communal en ina visualisaziun sur d'ina pusseivla sanaziun dil CSC. L'occurrenza vegn cumbinada cun in apert per la populaziun.

Gerou Clemens Berther:

David Krummenacher ha abdicau sia piazza da bostger tier il menaschi tecnic sin la fin december 2017. El ha survegniu in contract dad ir professionalmein cun velo. David Krummenacher ei staus engaschaus naven dils 01.04.2016.

Sco successur ei Pirmin Lombris vegnius eligius, el entscheiva sia piazza stabla culs 01-01-2018. Pirmin ha giu absolvii siu emprendissadi da bostger tier il menaschi tecnic e serrau giu quel la stad vargada cun la megliera nota dil cantun Grischun, 5.8. Suenter ei Pirmin staus engaschaus sco concluvrer temporar durant 4 meins.

- * Maschina ISEKI vegn furnida ils 17 da november 2017.
- * Remisa a Sogn Placi (planisada el 2017) vegn exequida igl onn 2018.
- * Survesta e scuntraziun da donns d'uau entras il bau-scorsa suonda mars/avrel 2018, tut en tut ha il bau scorsa taccau biebein 5'500 m³ lenna. Malgrad ils miserabels prezis da lenna vegn ei a dar in quen ulivau (rumida dils donns), motivs ein la buna collaboraziun e buns prezis cun la firma da helicopter e ch'ina gronda part ha saviu vegnir luvrau si en atgna reschia.

Gerou Victor Flepp:

Las elecziuns dil tgamun dils pumpiers ei succedidas. Sco vicecumandants ein eligi Pierino Bisquolm e Roger Keller. Cumandant ei vinavon Gion Tenner.

Il pumpiers ston cumprar in niev vehichel in TLF per frs. 450'000.--. La segirada da baghetgs dil cantun surpren 27,5% dils cuosts. La summa restonta vegn repartida sin las vischnauncas cumpigliadas.

Plinavon vegn in ulteriur vehichel per il survetsch ABC cumpraus e finanziaus dil cantun.

Cussegl:

Cusseglie Wendelin Jacomet ha inoltrau tenor art. 42 dil regulativ da fatschentas in postulat cul tetel:

Realisar in project d'ina rundella ed in sutpassadi per procurar la segirtad dil traffic d'autos, pedunzs e velocipedists ad Acla da Fontauna.

Cussegl da vischnaunca Disentis/Mustér
Il president: Igl actuar:

Christoph Berger

Paul Duff

Disentis/Mustér, ils 22 da november 2017